

## Cheryl Kubin – Pioniergeist

*Vier Freund beim Bier. A sucht den Pioniergeist, während ihr/ihm alle ständig ins Wort fallen und ihr/ihm das Gespräch langsam entgleitet.*

A: Mängisch frogi mi scho, was mit dem Ochse los esch.

B: Was söll met dem Ochse lo sii?

A: Jo, aso wieso nüt los esch meini.

C: Aso, me donkts s esch ame scho öppis los.

A: Jo scho, aber früener esch no voll meh los gsi! Do esch die Beiz ame es Restaurant gsi ond obe im Saal hets Konzärt gä ond im Stägehuus hets schiints emol en Töggelichaschte gha ond en Grill. Do het me alles chönne mache i dem Huus! Läbe, Fiire, Tanze, Trenke, Politisiere, jo sogar Poschte het me ame chönne im Gmüeschratte äne.

C: Jo aso lichaufsmöglechkeite hesch do omenand ämel ned zwenig.

A: Nei klar ned.

D: Ond öber d Getränkeuswahl chasch iez au ned jommere.

A: Jo das stemmt.

B: Ond läbe loht sechs do ämel guet.

A: Jo, scho -

C: Ond gfiiiret hämmer au guet letschte Wochenänd.

A: Jo, ..

D: Ond politisiere wottscht du jo vo allne am allerwenigschte.

A: Joo, ..

B: Aso was jommerisch denn?

A: I jommere jo gar ned. I ha nome welle säge, ..

C: Aso ehrlech gseit het das vori schochli nach Jommere tönt.

A: Jo, aber

D: Das fendi aso au.

A: Scho, aber

B: Jommere uf höchem Niveau.

## Pioniergeist

A: Notürlech, aber

C: Luxusproblem.

A: Gopferdami, döfi ou mol usrede.

B: Chonnt drufah.

A: Uf was?

C: Öbd weder nor wottsch jommere oder ned.

*B, C und D lachen, A findet nicht so lustig*

A: De sägi halt nüt meh.

D: Mer ziend di doch nome uf.

B: Logisch döfsch usrede, wennd öppis z säge hesch.

C: Ond döfsch au chlööne, wenn der denoo esch.

A: I ha jo gar ned welle chlööne. I ha nor welle säge, dass mi Wonder nemmt, wieso sech das Huus eso veränderet het.

B: Das het vori aber echli andersch tönt.

A: Okay, aber

C: Veränderige send jo ned grondsätzlech schlächt.

A: Nei klar,

D: Veränderige chöne dorchus au positiv sii.

A: Jo, aber i be doch grad dra e Text schriibe för das Jubiläumsfescht vode Gnosseschaft ond de hani halt met verschedne Lüüt gredt, wo do debii gsi send - bide Gröndig aber au spöter. Wo im Vorstand gsi send oder do gwohnt händ.

*B, C und D hören zu - A leicht irritiert, fährt aber fort*

A: Jedefalls het me bi dem Projekt ide Afäng sono grossi gemeinschaftlechi Energii gspüürt. Do esch so vell Pioniergeischt z gspüüre gsi i dere Gnosseschaft. I dem Huus. Ond dä esch egendwie wäg.

*B, C und D schweigen immer noch, A ist eigentlich schon fertig mit Ausführungen, hat aber das Gefühl noch etwas hinzufügen zu müssen.*

## Pioniergeist



A: Aso ich mein, d Gnosseschaft gez jo emmer no ond me cha do no wohne ond is Fүүrobepier ond i Usgang, aber d Gnosseschafts- ond Mietersetzige send superschlächt bsuecht. Es esch alles sochli anonymer worde halt.

*Soeben tritt jemand in die Beiz B und C sagen Hallo, wie gehts, etc.*

A: Aso anonym esch iez velech s falsch Wort. Aber me duet sech eifach nömm so fescht driigä. Me wohnt eifach do, oder esch Gast do. Ned meh ond ned weniger.

*B, C und D schweigen immer noch. A weiss nichts weiteres zu sagen. Bizeli unangenehme Stille.*

*Schliesslich nimmt C den Faden wieder auf.*

C: Aso ond ich verstoh das richtig. Du dänksch es esch höt so wies esch, wel de Pioniergeist abhande cho esch onderwägs.

A: Jo genau!

B: Ond iez frogsch di wo ond werom as dä abhande cho esch?

A: Genau. Ganz genau das hani mi ebe gfrogt.

D: Hmm. Gueti Frog.

B: Überlegge mer doch mol, wenn as das chönnt passiert sii. Ich mein, wie alt wär denn dä Geischt iez öppe?

A: Jo sochli öppis über Vierzgi.

C: Hmm. Meinsch es esch em velech z luut gsi em Huus? So met dene vellne Konzärt, wo du gseit hesch ond em Töggelichaschte im Stägehuus?

A: Aso, i danke iez ehrlechseit ned, ..

B: Jo oder velech hets em gstonke vom Grill em Stägehuus.

C: Ou jo, oder wägem Chnolibrot, wos emmer serviert händ ide Beiz.

D: Hey nüt gäg das Chnolibrot. Das hani as Chend mol gha, vo dem troimi höt no.

B: Du troimsch vo Chnolibrot?

C: Interessant.

A: Aso ehrlech gseit, weisi iez ned, öb, ..

D: Velech escher au metem Luigi Colani abghaue.

B: Met wäm?

## Pioniergeist

D: Metem Luigi Colani. Das esch sone verrückte Designer gsi. De het Autos ond Flogzüg ond so Sache designet. Ond de hämmer mol bem Brunch em Ochse troffe.

C: Sett wenn chame im Ochse brunche?

D: Chame ned. Aso nömm - früener hett me chönne. Ond de beni met mine Eltere ab ond zue gsi, ond einisch esch dä Luigi Colani au det gsi met sinere Fröndin. Das glaubt einen elei ned, was sech die alles händ lo uftesche! Aber het ämel en sympathische lidrock gmacht. Aso wenni e Pioniergeischt wär, hätti mi velech scho dem aghänkt.

B (*lachend*): Wenn du e Pioniergeischt wärsch!

D: I meine jo nor - dä het of de ganze Wält gschaffet, das wär secher no spannend gsi, däm über d Scholtere gügsle.

A: Aso,

C: Gäl, velech eschs dem Pioniergeischt au eifach echli langwillig worde im Ochse. Emmer politisiere, emmer Chnolibrot ond Brunch

D: Hey, nüt gäg das Chnolibrot!

B: Jo ond hesch ned du letschti gseit, ade Mietersetzige heiges au emmer nome über s gliiche Züg diskutiert?

A: Wär, ich? Ich be doch nonie anere Mietersetzig gsi.

B: Scho klar. Aber das händ doch dini Interviewpartner gseit.

A: Aha jo, aso nei, si händ ned gseit, dass si emmer über s gliiche diskutiert händ. Si händ eifach alli vo de gliiche Theme verzellt, aso Wöschchochi, Chatze, ..

C: Was jo am Schloss äüä öppe of s gliiche uselauft.

D: Aso wenn i ade Mietersetzig emmer über Chatze ide Wöschchochi hätt müesse diskutiere, hätti au d Flüüge gmacht.

A: Ned Chatze ide Wöschchochi,

D: Jo esch jo egal wo, aber i danke au, dem eschs doch eifach langwiillig gsi do im Ochse, dorom esch dä abghaue.

A: Aso, ..

C: Gäl, egendwenn wersch au älter ond chasch di nömmе för di gliiche Sache begeistere wie no met zwänzgi.

A: Ich, ..

## Pioniergeist

B: Velech escher jo au met dem Detektiv zäme abghaue.

C: Uuh, wele Detektiv?

A: Jo es het schiints mol e Detektiv do gwohnt. Oder besser gseit, er het sis Detektivbüro do inere WG gha.

D: Es Detektivbüro inere WG?!

A: Jo, aso

C: Krass.

A: Joo,

D: Hey nei, stell der mol vor be der ide WG wörd en Detektiv wohne.

C: Das wär onder Omständ no praktisch.

D: Oder onder Omständ au rächt onagnähm?

C: Wieso onagnähm?

D: Jo weisch jo nie, öber ned dech am usspioniere esch.

C (lachend): Aso be mer gäbs glaubs ned allzu vell uszspioniere.

D: Gsesch das seisch du iez eifach, aber wenn mer iez do e Detektiv hätte, womer chönnte of di aasetze, de gsächts velech plözli ganz andersch us..

C: Mach der nome ned z vell Hoffnige!

D: Aber meinsch de Pioniergeischt het au öppis welle usefende? Ond esch denn dorom metem Detektiv abghaue?

B: Dänki ned.

C: Hä wieso ned?

A: Es esch schiints de doch ned sone rechtige Detektiv gsi.

C: Hmm.

D: Aso die Geischtersach esch verzweckt.

A: I weiss iez ehrlech gseit au ned, öbs wahnsennig vell helft, wenn mer so anen ächte Geischt danke.

C: Hä, wieso ned?

A: Das esch jo nome en Art zom säge gsi, dass do die Lüüt zäme e grossi Idee gha händ ond alli sech mega drii gä händ.

D: Velech esch genau das jo s Problem.

## Pioniergeist

A: Velech esch genau was s Problem?

D: Dass di Jonge höt eifach ned a Geischer glaube.

A: Aber,

D: Nei ächt iez. Mängisch hani s Gefühl de Jonge fählt de Glaube. Ond wie wott me sones Huus met Läbe erfülle, weme a nüt glaubt.

C: Velech sötte mer ois wörklech ärschthhaft of d Suechi nach däm Geischt mache.

A: Aso ärschthhaft iez?

D: Äh jo klar ond sigs nome, damet du öppis hesch, wod de dra chasch glaube.

A: Aber,

B: I dänke sueche esch de falschi Wäg.

C: Wie meinsch iez?

B (verschwörerisch): Geischer muess mer ned sueche. Geischer muess mer ufebeschwöre.

D: Ui! Kennsch du dech us met so öppis?

B: Nei. Aber i ha em Wald mol so es paar Vermummti gseh, wo usegseh händ, als wöre si grad e Geischt ufebeschwöre. Oder ämel wenigschdens es Gwetter oder so öppis.

C: Ond was händ de die gmacht?

B: Jo die send omene Cherze omegmarschiert ond händ werri Sache vo sech gä.

D: Was för werri Sache?

B: Jo so ganz genau hani das ned verstande.

C: Schad.

B: Jo aso du wörsch iez au ned so mir nicht dir nichts ine Geischerbeschwörig ineplatze.

C: Trotzdem schad. Das hätt ois iez velech gholfe, wennd det ineplatzt wärsch.

D: Mer chöne jo sälber öppis erfende. Det of de Kafimaschene stoht doch emmer no s Günti-Glas metem Cherzli denne.

B: Ond was genau esch s Günti-Glas?

C: Hesch de Günti ned kennt?

B: Ääh, weiss grad gar ned.

C: Mol de esch jede Tag im Ochse gsi. Meischdens hetter es Glas Wiisswii gno zom Apéro. Dä Wii esch onderem Personal sogar offiziell de Günti-Wii gsi.



## Pioniergeist

D: Ond usgseh hetter ämel definitiv als chönnt er Geischer beschwöre. Emmer schwarz aagleit.

Zemli dönn, chorz gschoorni helli Hoor, bleich.

B: Ond iez? Chonnt er nömm?

C: Nej, de esch gstorbe.

D: Ond setter gstorbe esch brönnt ebe das Cherzli im Günti-Glas.

B: Das tönt i dem Fall wörklech ideal zom Geischerbeschwöre.

*A mustert schweigend seine Freunde.*

C: Ond wie wöre mer de de Gesicht aarüefe? Oder aso ufebeschwöre?

D: Mer chönnte es Gedecht schriibe.

B: Oder es Lied?

*A steht auf*

A: I go de mol eis go roike.

*B, C und D blicken nur kurz auf und nicken, dann diskutieren sie weiter über die geplante Geisterbeschwörung.*